

ի սիրտս իւրեանց. եւ յամենայն կռուոյ, աւգնականութեամբ հզաւրին, ողջանդամք յաղթողք եւ անուանիք դառնային: 6 Եւ որք յաղագս ծերութեան եւ կամ ծանրամտութեան, ըստ մարմնոյ բնութեան, ուսանել ոչ զաւրէին՝ համայն յերկար աղաւթիւք եւ անվաստակ յոտն կալով<sup>1</sup> առաւել եւս կամաւոր յաւժարութեամբ անքուն եւ անհանգիստք լինէին. եւ էր տեսանել զամենեսեան որդիս լուսոյ եւ մանկունս արքայութեան:

7 Նոյնպէս եւ կանայք, որոց նահատակեալ մարտիրոսացան արքն, եւ այլոց կանանց<sup>2</sup>, որոց էին ի կապանս արքն ի Զրեւ՝ բազում պարկեշտասեր առաքիւնութեամբ մի զմիով ելեւելս առնէին, *զաւր ամենայն մեռանելով ամենայն ախտից*<sup>3</sup>. ըստ բանի մարգարէին կենդանի մարտիրոսք էին. առ որս յաղթի բան՝ ասել որոշողութեամբ<sup>3</sup> զսաստիկ վարուցն նոցա ճգնութիւնս, որք անցուցին զբազում արամբք, եւ զքնական տկարութիւն մարմնոյ կանանց զաւրացուցեալ առաւել քան զարանց՝ քաջայաղթողք եղեն: 8 Կանայք փափուկք, դստերք նախարարացն եւ կանայք աւագաց, փոխանակ նաշիոյ կորեակ ուտէին, եւ փոխանակ պարզ գինւոյ ջուր չափով ըմպէին. փոխանակ կերպասեայ ոսկեհում <sup>4</sup>զգեստուցն խոշոր բրդեայս զգենուին, եւ փոխանակ բազմադիմի անկողնոցն փոխայիւք ի վերայ երկրի գետնատարածք լինէին. եւ որք յառաջագոյն յամրանային ի քուն՝ նմանեալք վերնոցն անքունք եղեն: 9 Չաւծան իւղով, ջարմարեցին սանտրով զհեր գլխոյ իւրեանց. եւ որում անհնար է յաղթել կանանց, շատխաւսութեան եւ ստեպ ընդ քաւղով այսր անդր<sup>5</sup> հայեցողութեան զաչս յածելոյ՝<sup>6</sup> ... ի ստեպ, եւ ցածուցին զլեզուս իւրեանց յաւելորդ խաւսից:

10 Յորոց խնդրուածս եւ ի վաստակս ի միասին արանց եւ կանանց ամենողորմն Աստուած հայեցեալ՝ յիշեաց զնահատակութիւն սրբոյն Վարդանայ եւ զամենայն միաբանելոցն ընդ նմա, եւ զբարեխաւսութիւն վկայելոց քահանայիցն Աստուծոյ, շնորհեալ պարգեւեաց դառնալ կապելոցն յաշխարհս Հայոց: 11 Որք եկեալ ի տունս իւրաքանչիւր յամի վեցերորդի թագաւորութեանն Պերոզի, եւ կեցեալք իւրաքանչիւր ոք<sup>7</sup> ըստ սահմանելոյ ի Տեառնէ՝ վախճանեալք թաղեցան ի դիրս հարց իւրեանց խաղաղութեամբ

1 Ատ. ոտն կալով

2 ԲԳտ. ուղղագրել էին յայլոցն կանանց

3 Զմմտ. Սաղմ. ԽԳ 22:

3 Ա. որոշողութեամբք

4 Ա. սգեստուցն... զգենոյին

5 Ա. ընդ քողով այսր անտր

6 ՏՏ. զաչս ածելոյ.- այստեղ ենթադրում ենք մի քանի բառի պակասորդ:

7 ՏՏ. իւրաքանչիւրոց